

GARRANTZIA DUTEN GAIETATIK ALDENDU ETA EZTABAIDA FALTSUAK SORTZEN DIRELA KRITIKATU DU HBK

HB: «Egungo erakundeak prozesuaren zerbitzuan nola erabili da eztabaida nagusia»

■ HBk eztabaida funtsezko gaietatik aldentzen ari dela nabarmendu du, eta garrantzitsuena prozesu politiko demokratikoa dela

■ Otegik dioenez, gai nagusia ez da HBk erakundeetan parte hartzen duen, erakundeak prozesuaren zerbitzuan nola erabili baizik

■ HBrentzat «lehentasunezko apustua lurraldetasunarena da», eta hala adierazi zuten Joseba Permachek eta Arnaldo Otegik

Eider Goenaga / Donostia

ARNALDO OTEGI eta Joseba Permachek funtsezko eztabaida desbideratzen ari dela eta eztabaida faltsuak bultzatzen direla kritikatu zuten atzo arratsean. «Elementu askoren inguruan, eta obsesiboki gai baten inguruan, ari da eztabaidatzen euskal politikagintza azken aldian. Eta, alde horretatik, HBko Mahai Nazionalak uste du komenigarria dela eztabaida hori zentratzea», adierazi zuen Otegik. Izan ere, legegintzaldi akordioa dela-eta, indarkeriaren gaitzespena dela-eta, HBk uste du ahaztu egiten dela egun arazo garrantzitsuena zein den. Hori dela eta, HBk egungo egoeraren irakurketa egin zuen, HBk dituen helburuak eta HBren barnean daramaten eztabaida azalduz.

«HB barruan egiten ari garen eztabaida ez da egungo instituzioei buruzkoa, ez gara gogoetatzeko ari nola sartu egungo erakundeetan, Euskal Herrian zein erakunde nazional mota nahi ditugun baizik», argitu zuen Permachek. Ildo horretan, Permachek esan zuen eztabaida nagusia dela nola jarri egun indarrean dauden erakundeak Euskal Herriak bizi duen prozesua bultzatzeko: «Egungo erakundeak prozesu demokratikoaren zerbitzuan nola jarri, hori da HBren eztabaida nagusia».

Izan ere, Herri Batasunaren ustez, garrantzitsuena Euskal Herria momentu honetan «prozesu nazional demokratiko» batean murgilduta dagoela da. Eta HBk, testuinguru horretan kokatuta, «lehentasunezko apustu bat» egiten

ARNALDO OTEGI

■ ■ ■ «HBk ez du lurreratze pista bat bilatzen, egungo erakundeetan sartu eta egungo esparru juridiko-politikoa bermatzeko. Euskal demokrazia oinarritzeko lurreratze pista da eraiki beharreko bakarra»

du, lurraldetasunaren aldeko «lehentasunezko apustua», alegia.

Horregatik, Euskal Herriko herrialde guztiak hartuko

dituen instituzio nazional bat sortzearen ezinbestekotasuna nabarmendu zuten HBko buruzagiek. «Eta hori da HBren apustu instituzionala, ez besterik», adierazi zuen Otegik. «HBk ez du lurreratze pista bat bilatzen, egungo erakundeetan sartu eta egungo esparru juridiko-politikoa bermatzeko. Izan ere, hori ezin da horrela izan, hori ez baita sekula izan ezker abertzalearen apustua. Hemen euskal demokrazia oinarritzeko lurreratze pista da eraiki

beharreko bakarra, euskal herritarrok geure hitza eman eta errespetatua izango den lurreratze pista», esan zuen Otegik.

Legegintzaldi akordioa

Bestalde, legegintzaldi akordioa ere egungo prozesuaren bultzatzaile gisa ikusten du

Juan Joxe Petrikorena HBko mahaikideak, eta horri buruz mintzatu zitzaion atzo Europa Press agentziari. Esan zuenez, akordioa sinatu ez bada ez da HBren errua izan. «Arazoa ez da gurea, guk sinatua izango genuke aspaldi, eta egin ez badugu ez da akordioarekin arazorik dugulako, norbaitek baiez-

koa eman ez duelako baizik», esan zuen Petrikorenak. Akordioa ia-ia eginda dagoela adierazi zuen, eta HB «nahiko aspertua» dagoela akordioa sinatzeko itxaroten. Petrikorenaren adierazpenei erantzunez, Lehendakaritza-tik «zuhurtzia eta elkarriketarako borondatea» eskatu zuten.



ANDER GILLENIA

Arnaldo Otegi eta Joseba Permachek, iaz Donostian eskainitako prentsaurreko batean.

Bilera ugari eta nahasmen franko

■ Pello Urzelai / Donostia

Eusko Jaurlaritzaren sustengu parlamentarioari buruzko akordioaren negoziaketak bilera ugari ekarri ditu. Apirilaren 22an Juan Jose Ibarretxe EAEn lehendakaria eta Arnaldo Otegi EHko bozeramailea bildu ondoren, alderdietako negoziatzaileek harreman

ugari izan zituzten gai honen inguruan aste horretan eta hurrengoan. Joan den astelehenean, maiatzaren 2an, Ibarretxe eta Otegi berriz bildu ziren, *Deia* egunkariak atzo zekarrenez. Alderdietako ordezkariak hurrengo egunean bildu ziren eta laster beste bilera bat egitekoak dira.

Deia egunkariaren informazioaren arabera, Ibarretxe eta Otegiren arteko azken bileraren ondoren akordioaren aukera hurbilago dago. Egunkari horrek Lehendakari-tzako iturriak aipatzen zituen, baina Lehendakaritza-ukatu egin dute informazio hori bertatik atera dela.

Horrez gain, HBk maiatzaren 15ean egin behar duen Batzar Nazionala akordioa gauzatze-ko garrantzitsuena izango dela zioen *Deia*-ko artikulugileak. Baina batzar horren edukia ez dator bat, HBko bozeramaileek atzo azaldu zuten, aipatu egunkariaren ikuspegiarekin.